



Број/Број:01,02,03,03/11-05-1-189/11  
Сарајево/Sarajevo: 23.9.2011.

## **IZVJEŠTAJ SA SASTANKA POTKOMITETA ZA MEDIJE PARLAMENTARNE SKUPŠTINE VIJEĆA EVROPE, ŠTOKHOLM, 12.9.2011.**

Na sastanku Potkomiteta za medije koji djeluje u okviru Komiteta za kulturu, nauku i obrazovanje Parlamentarne skupštine Vijeća Evrope, održanom 12. septembra 2011., učestvovalе su Ismeta Dervoz, zamjenik člana Delegacije PSBiH u PSVE, i Edina Vejzagić, sekretar Delegacije. Glavna tema sastanka bila je sloboda medija u Evropi, te je u tu svrhu organizirano saslušanje uz učešće eksperata:

- Dunje Mijatović, predstavnice OSCE-a za slobodu medija; Agnes Callamard, izvršne direktorice člana 19. Globalne kampanje za slobodu izražavanja, Arne Koniga, predsjednika Evropskog saveza novinara, Williama Horsleya, predstavnika Udruženja evropskih novinara za slobodu medija, Paula Raudsepsa, predsjednika Savjetodavnog odbora sedmičnog magazina „Ir“ iz Latvije.

U raspravi o stanju medijskih sloboda u Evropi istaknuto je da ne postoji alternativa za slobodu govora ni bilo kakav izgovor za ograničavanje slobode govora. U tom smislu, učесnici diskusije osvrnuli su se na slučajeve pritvaranja novinara u zemljama članicama Vijeća Evrope, potencirajući prvenstveno slučajeve u Azerbejdžanu, Turskoj, te pogoršanje stanja slobode medija u Mađarskoj. Bitan preduslov slobode medija je, kako je istaknuto, i dekriminalizacija klevete. Dunja Mijatović, predstavnica OSCE-a za medije, navela je kako je samo trinaest zemalja dekriminaliziralo klevetu (među njima je i BiH), te kako bi taj primjer trebalo da slijede i ostale zemlje. Nadalje, kada je u pitanju sloboda interneta, iznesena su stajališta kako bi trebalo slijediti primjer Estonije i Finske koje su definirale pristup internetu kao ljudsko pravo, ali su iznesene i objektivne primjedbe u vezi s finansijskim reperkusijama garantiranja tog prava, te neophodnošću legitimnih ograničenja interneta u slučajeвima podsticanja mržnje, pedofilije i drugih negativnih pojava.

Jedan od aspekata slobode medija koji je posebno potenciran na sastanku bilo je ograničavanje slobode medija koje se opravdava pitanjima nacionalne sigurnosti i antiterorističkim zakonodavstvom. Novi zakoni usvajani uglavnom poslije događaja od 11. septembra 2001. godine u velikom broju slučajeва predstavljaju prepreku ostvarivanju osnovnih ljudskih prava, a diskurs o nacionalnoj sigurnosti uveden je u sve aspekte svakodnevnog života. Zbog činjenice da se antiteroristički zakoni neselektivno primjenjuju kako bi ograničili slobodu izražavanja, neophodno je da sve zemlje jasno definiraju kriterije za nacionalnu sigurnost.

U kontekstu diskusije o slobodi medija, nekoliko učesnika istaknulo je i potrebu za većom odgovornošću medija navodeći nedavne primjere narušavanja privatnosti građana u Velikoj Britaniji, kao i nereda u Londonu koji su potaknuti društvenim mrežama. U tom smislu, naglašeno je kako potencijal medija, posebno društvenih mreža, ne smije biti potcijenjen, dok, s druge strane, mediji treba da postupaju u skladu s etičkim kodeksima i koriste mehanizme samoregulacije.

Pripremila:

Edina Vejzagić

Ismeta Dervoz

Dostavljeno:

- kolegijima oba doma
- Delegaciji PSBiH u PSVE
- Komisiji za vanjske poslove PD
- Komisiji za vanjsku i trgovinsku politiku, carine, saobraćaj i komunikacije DN
- Kolegiju Sekretarijata
- a/a